

08 AUG 1997

Asean-Indonesia

PELBAGAI ACARA MERIAHKAN ULANGTAHUN ASEAN

Oleh: Khairdzir Yunus

JAKARTA, 8 Ogos (Bernama) -- Indonesia menyambut ulang tahun Asean ke 30 hari ini dengan pelbagai acara termasuk hiburan.

Perayaan sepanjang tahun itu dimulai dengan upacara menaikkan bendera Asean dan bendera sembilan negara anggota -- Indonesia, Malaysia, Filipina, Singapura, Thailand, Brunei, Vietnam, Laos dan Myanmar -- di Sekretariat Asean di sini pagi ini.

Setiausaha Agung Asean Datuk Ajit Singh dan semua duta negara-negara Asean menyaksikan upacara itu.

Upacara dimeriahkan dengan persembahan pancaragam yang terdiri daripada anak-anak kakitangan Kementerian Kerja Raya Indonesia.

Majlis juga ditandai dengan upacara pelepasan 30 ekor burung merpati putih oleh kanak-kanak yang membawa bendera.

Malam tadi Pesta Lagu-lagu Asean diadakan di auditorium stesen Televisi Republik Indonesia di sini dengan persembahan oleh artis-artis popular dari negara-negara Asean.

Forum Perniagaan Asean pula malam tadi menganjurkan Malam Anugerah Pencapaian Asean dengan menyampaikan anugerah kepada tokoh-tokoh dari negara-negara anggota yang cemerlang dalam pelbagai bidang kehidupan.

Antara penerima ialah Presiden Majlis AIDS Malaysia Datuk Paduka Marina Mahathir bagi bidang kemasyarakatan, Presiden dan Ketua Pegawai Eksekutif MIMOS Bhd Datuk Tengku Mohd Azzman Shariffadeen Tengku Ibrahim bagi bidang Teknologi Maklumat dan Naib Canselor Universiti Teknologi Malaysia Datuk Dr Ahmad Zaharudin Idrus bagi bidang sains.

Anugerah disampaikan oleh Menteri Penyelaras Bidang Produksi dan Distribusi Indonesia Hartarto Sastrosoenarto.

Upacara sambutan ulangtahun ASEAN ke-30 akan dirasmikan oleh Presiden Suharto malam ini pada jamuan makan malam di Balai Sidang Jakarta di sini.-- BERNAMA

KHY MAI